

И князь великий Дмитрии Ивановичъ говорить: Брат(и)я и бояре, князи молодые, вамъ, брат(и)е, сужено мѣсто межъ Дономъ и Непра на полѣ Куликовѣ на рѣчки Направдѣ. Положили есте головы за рускую землю и за вѣру хрѣстьянскую. Простите мя, брат(и)я, и благословите в семь вѣщы и в будущемъ.

4. СПИСОК УНДОЛЬСКОГО¹

Слово о великом князе Дмитрее Ивановиче и о брате его князе Владимире Андрѣевиче, яко побѣдили супостата своего царя Мамаю

Князь великий Дмитрий Ивановичъ с своим братом с княземъ Владимиром Андрѣевичем и своими воеводами были на пиру у Микулы Васильевича. Въ[домо намъ], брате, у быстрого Дону царь Мамай пришел на Рускую землю, а идет к намъ в Залѣску(л. 170)ю землю. Пойдем, брате, тамо в полунощную страну жребля Афетова, сына Ноева, от него же родися Русь преславная. Взыдем на горы Киевския и посмотрим с равнаго Непра и посмотрим по всей земли Руской. И отоля на восточную страну жребий Симова, сына Ноева, от него же родися Хиновя поганые татаровя бусормановя. Тѣ бо на рекѣ на Каялѣ одолѣша родъ Афѣтов. И отоля Руская земля (л. 170 об.) сѣдитъ невесела.

А от Калатьския рати до Мамаева побоища тугою и печалию покрывшася, плачущися, чады своя поминаюты. Князи и бояря и удалые люди, иже оставиша вся дома своя и богатство, жены и дѣти и скот, честь и славу мира сего получивши, главы своя положиша за землю за Рускую и за вѣру хрѣстьянскую, собѣ бы чаем пороженных и воскормленных (л. 171). Преже восписах жалость земли Руские и прочее от кних приводя. Потом же списах жалость и похвалу великому князю Дмитрею Ивановичю и брату его князю Владимиру Одрѣевичю.

Снидемся, братия и друзи и сынове Рускии, составим слово к слову, возвѣседим Рускую землю и возвѣрзем печаль на восточную страну в Симов жребий и воздадим поганому Мамаю побѣду, (л. 171 об.), а великому князю Дмитрею Ивановичю похвалу и брату его князю—Владимеру Андрѣевичю. И рцем таково слово: лудчи бо нам, брате, начяти повѣдати иными словесы от похвальных сихъ и о нынешних повѣстех похвалу великому князю Дмитрею Ивановичю и брату его князю Владимиру Андрѣевичю, а внуки святаго великаго князя Владимира Киевскаго. Начаша ти повѣ(л. 172)дати по дѣлом и по былинам. Не проразимся мыслию но землями, помянем первых лѣт времена, похвалим вещаннаго боярина, горазна гудца в Киеве. Тот боярин воскладаша горазная своя персты на живыя струны, пояща руским князем славу, первому князю киевскому Игорю Бяриковичю и великому князю

¹ № 632, середина XVII в. Всесоюзная Библиотека им. В. И. Ленина.